

Na osnovu člana 11. stav 4. tačka 3. Zakona o Policiji Brčko Distrikta BiH ("Službeni glasnik Brčko Distrikta BiH" broj 2/00, 5/01, 2/02, 17/02, 6/03 i 15/04) i člana 31. stav 4. Zakona o oružju i municiji Brčko Distrikta BiH ("Službeni glasnik Brčko Distrikta BiH" broj 17/02 i 23/02), Šef Policije donosi

## **P R A V I L N I K**

### **o utvrđivanju uslova i rokova za pregled oružja**

#### **Član 1.**

Ovim Pravilnikom propisuju se uslovi i rokovi za pregled oružja lica koja to oružje drže na osnovu oružnog lista (u daljem tekstu: imalac oružja).

#### **Član 2.**

Policija je dužna da organizuje i obezbijedi pregled oružja koje se vodi u evidenciji Policije.

#### **Član 3.**

- (1) Imaoci oružja dužni su da na poziv Policije Brčko Distrikta BiH (u daljem tekstu: Policija) donesu oružje na pregled.
- (2) Protiv imaoca oružja koji ne donese oružje na pregled Policija će podnijeti zahtjev za pokretanje prekršajnog postupka zbog prekršaja iz člana 31. stav 4. Zakona o oružju i municiji Brčko Distrikta BiH.

#### **Član 4.**

Pregled oružja vrši se najmanje jedanput u pet godina, na pismeni poziv Policije.

#### **Član 5.**

- (1) Pregled oružja vrši Komisija za pregled oružja imaoca oružja (u daljem tekstu: Komisija), koju imenuje Šef Policije.
- (2) Komisija se sastoji od predsjednika i dva člana.

#### **Član 6.**

Pregled oružja vrši se u prostorijama koje odredi Šef Policije na prijedlog Komisije, vodeći računa o najvišem stepenu bezbjednosti.

#### **Član 7.**

- (1) Komisija utvrđuje tehničku ispravnost oružja i provjerava da li podaci o tom oružju odgovaraju podacima koji se vode u oružnom listu i službenim evidencijama Policije.
- (2) Radi utvrđivanja individualnih karakteristika oružja, prilikom pregleda oružja izvršiće se ispaljenje po tri metka iz svakog oružja i u bazu podataka deponovati uzorci zrna i čaura ispaljenih metaka za oružja sa olučenim cijevima odnosno uzorci čaura za oružja sa neolučenim cijevima.
- (3) Ispaljenje metaka iz prethodnog stava vršiće se i prilikom izdavanja oružnog lista za novo oružje ili oružje koje mijenja vlasnika, a za koje potrebni uzorci zrna odnosno čaura ranije nisu uzeti.

**Član 8.**

- (1) Pregledu oružja prisustvuju samo članovi Komisije i imalac oružja čije se oružje pregleda.
- (2) Komisija o svom radu sačinjava zapisnik.

**Član 9.**

- (1) Troškove pregleda oružja snosi imalac oružja.
- (2) Troškovi iz prethodnog stava iznose 5,00 (pet) KM po jednom oružju koje se pregleda.
- (3) Imalac oružja dužan je da prije pregleda oružja na Jedinstveni račun Brčko Distrikta BiH uplati iznos iz prethodnog stava i dokaz o tome predoči Komisiji prije pregleda oružja.

**Član 10.**

- (1) U slučaju da Komisija utvrdi da je oružje dotrajalo u tolikoj mjeri da njegova upotreba može ugroziti bezbjednost ljudi, a ne postoji mogućnost da se oružje popravi ili prepravi, uputiće imaooca oružja da takvo oružje preda Policiji i da traži da se oružje briše iz evidencije o nabavljenom oružju shodno članu 45. stav 1. Zakona o oružju i municiji Brčko Distrikta BiH.
- (2) U slučaju da Komisija utvrdi da je oružje dotrajalo, ali da postoji mogućnost da se popravi ili prepravi, uputiće uputiće imaooca oružja da takvo oružje popravi ili prepravi kod pravnog lica koje je registrovano za popravlanje ili prepravlanje oružja ili je popravlanje ili prepravlanje oružja registrovano kao jedna od djelatnosti kojim se ona bave.
- (3) Imalac oružja je dužan je u roku od 60 dana od dana pregleda oružja Policiji priložiti dokaz o izvršenom popravljanju ili prepravljanju oružja.

**Član 11.**

Ovaj Pravilnik stupa na snagu danom donošenja i objaviće se u "Službenom glasniku Brčko Distrikta BiH".

Broj: 05-1565/04  
Datum: 08.09.2004. godine

**Š E F**  
**POLICIJE BRČKO DISTRIKTA**

**Milenko Milićević**